



BOSANSKOPETROVAČKI VJESNIK

Mjesečnik Općine Bosanski Petrovac

Uređuje: Kabinet Općinskog načelnika, tel.: 037/883-570 i 037/883/571, fax: 037/881-012, e-mail: opcinabp@bih.net.ba

Pokret za Evropu

Dana 3.8.2017. godine u Cazinu je organizovan Poslovni forum „Društveni dijalog Evropskog pokreta u BiH“, na kojem je učestvovao i načelnik Opštine Bosanski Petrovac, Zlatko Hujić.

Ovaj Poslovni forum je održan u okviru obilježavanja Dana Evrope, a razgovaralo se o nizu aktuelnih i za razvoj Bosne i Hercegovine važnih tema, poput ekonomije, lokalne samouprave i problemu odlaska mladih iz naše države.

Učesnicima su se u panel diskusiji obratili Muhamed Mujakić, osnivač i direktor Pravnog instituta BiH, Nermin OGREŠEVIĆ, gradonačelnik Cazina, Bruno Bojić, predsjednik Vanjsko-trgovinske komore BiH, Edin Dilberović, direktor Direkcije za Evropske integracije BiH i brojni drugi stručnjaci iz oblasti srodnih pomenutim temama.

Gradonačelnik Cazina Nermin OGREŠEVIĆ dobio je priznanje za „Evropskog gradonačelnika regiona“, dok su općine Bosanska Krupa i Bosanski Petrovac dobile priznanje za „Otvorene lokalne zajednice – partner EU integracija“, a nagradu im je uručio Predrag Praštalo, predsjednik Evropskog pokreta u BiH.

Po riječima svih učesnika i pratitelja Foruma održanog u Cazinu, sve obrađene **teme bile su korisne i aktuelne**, ali su i otvorile niz novih pitanja koja će sigurno biti iskorištena u radu domaćih privrednika i institucija koji, kako su naglasili, žele potaknuti političare u našoj zemlji da se počnu aktivno baviti ekonomskim razvojem zemlje, davati radne i konkretne rezultate i mijenjati percepciju o Bosni i Hercegovini.

Sa Foruma je poslata poruka mladima da trebaju odlaziti, ali samo kako bi se vratili sa novim znanjima i vještinama koje će implementirati u svojim matičnim zemljama, odnosno u našem regionu.



Svečano uručenje priznanja načelniku Hujiću

9. redovna sjednica OV

Dana, 15.8.2017. godine, održana je 9. redovna sjednica Opštinskog vijeća, za koju je bio predložen obiman dnevni red.

Odmah na početku, poslije najvažnije tačke koja se odnosila na Izjašnjenje o opozivu Zamjenika Predsjedavajuće opštinskog vijeća, utvrđeno je da postoji nova parlamentarna većina.

Preostale tačke koje su dalje razmatrane nisu od trenutnog ekonomskog značaja za našu Opštinu, ali svakako doprinose razvijanju svjetlije budućnosti.

Ovim „Opština Bosanski Petrovac ipak i konačno kreće u pravom smjeru, dolasku novih investicija, i nastavku započetih, realizaciji novih projekata i svih drugih ekonomskih značajki koji će našu Opštinu učiniti mjestom boljeg življenja“, istakao je načelnik Hujić i dodao da vjeruje u novu demokratsku većinu u Opštinskom vijeću koja je multipartijska, multietnička i sastavljena od izabраниh zvaničnika oba pola, mladih i stručnih ljudi koji su spremni podržati progres, investicije i svakako dobre ekonomske poteze i projekte izvršne vlasti.



Na sjednici Opštinskog vijeća

Potpisani tripartitni Ugovori

Načelnik Zlatko Hujić i predstavnik Ministarstva za raseljena lica i izbjeglice F BiH, dana 22.08.2017. godine potpisali su u Kabinetu načelnika sa 4 korisnika tripartitni ugovor o donaciji građevinskog materijala za sanaciju stambenih objekata.

Riječ je o povratnicima koji su aplicirali na Javni poziv Federalnog ministarstva za raseljena lica i izbjeglice 2015. godine i svi oni su ispunili uslove koji su zakonom propisani i prošli procedure, a komisija je izašla na lice mjesta i snimila objekte i transparentno izvršila odabir korisnika.

“Svaki korisnik će dobiti specifikaciju materijala koji je doniran, a budući da su tenderske procedure u toku uskoro se može očekivati i isporuka građevinskog materijala i početak radova”, istakli su predstavnici Ministarstva.

Načelnik Hujić, obraćajući se korisnicima donacije za sanaciju kuća, istakao je da ova lokalna zajednica vodi računa o povratnicima i izbjeglim licima, odnosno svima onima koji su ostali bez stambenih jedinica.

“Ovo je još jedna u nizu aktivnosti koju smo proveli sa partnerima, u ovom slučaju sa Federalnim ministarstvom, čija donacija će dobro doći našim sugrađanima”, rekao je Hujić.

Korisnici koji su se našli u stanju potrebe su: **Mrđa Marinko, Kahrić Esmir, Mrđa Slavko i Rakić Petar.**

Opština se obavezala da će pružiti pomoć korisniku i donatoru u cilju što bolje implementacije obnove stambene jedinice. “Ovo je dokaz progresivne stambene politike koju nastavlja opštinska administracija”, istakao je načelnik Hujić.



Korisnici sa predstavnicima Opštine i Ministarstva

Sastanak sa predstavnicom ILDP-a

Na osnovu potpisanog Protokola o saradnji između Opštine Bosanski Petrovac i Projekta integriranog razvoja (ILDP III), od 23.06.2017. godine, dana 18.8.2017. godine je u Kabinetu načelnika održan sastanak sa predstavnicom ILDP-a, predstavnicima Jedinice za upravljanje lokalnim razvojem i Tima za monitoring.

Na sastanku se razgovaralo o samoprocjeni procesa koji su implementirani (realizovani) u prethodnom periodu (u 2016. godini) u našoj Opštini od strane Tima za monitoring, kao i o aktivnostima koje se trebaju realizovati u narednom periodu.

Sastanku je prisustvovao i načelnik Hujčić koji je dodao da je Strategija Opštine jako bitan dokument jer su tu sadržane sve instrukcije, metode, načini koje su od ključnog značaja za razvitak naše Opštine, u smislu apliciranja međunarodnim institucijama, projektima od značaja građanima.

Strategija razvoja opštine Bosanski Petrovac 2011-2020 godine predstavlja ključni strateško-planski dokument, koji treba da podstiče rast i razvoj zajednice. Strategija razvoja obuhvata društvenu, ekonomsku, okolišnu, kao i prostornu sferu.



Tokom sastanka u Kabinetu načelnika

Demant na tekst objavljen na portalu krajina.ba

Bosanski Petrovac, 11.08.2017. godine

Predmet: Demant na tekst -

Dana 10.08.2017. godine, na portalu krajina.ba objavljen je tekst pod nazivom „Hoće li doći do preslagivanja u OV Bosanski Petrovac nauštrb Bošnjaka? Sve zavisi od A-SDA i Naše stranke!“, u kojem se boldirano ističe da je na čelu nove prosrpske koalicije načelnik Zlatko Hujčić.

U tekstu se izražava tobožnja zabrinutost za opstanak Bošnjaka u općini, koja se, prema navodima iz teksta očituje kroz novo preslagivanje političkog utjecaja u OV, kao i moguću smjenu zamjenika predsjedavajuće OV, a ujedno i predsjednika OO SDA Bosanski Petrovac, Midhe Hidića.

Pa da podsjetim javnost i autora članka da je u najmanju ruku licemjerno prozivati bilo koju stranku na izdaju ili majorizaciju Bošnjaka u Bosanskom Petrovcu, **kad je „prva stranka u Bošnjaka“, od uspostave novog saziva vijeća, pa sve do zadnje sjednice u mjesecu junu bila dio takozvane Semafor koalicije**, koju su, pored SDA, SBB i zalutalog DF-ovca, činili i vijećnici Dodikovog SNSD-a i Đokićevog SP-a.

Srećom, pojedinci su na vrijeme shvatili svu apsurdnost takvog saveza i svoga djelovanja u istom.

U tom periodu, jedini cilj pojedinih vijećnika je bio onemogućiti normalno funkcionisanje organa uprave, pokušavajući na taj način da oslabe funkciju Općinskog načelnika. Prisjetimo se samo sage oko budžeta Općine, nedonošenje odluke o privremenom finansiranju, tjeranje investitora iz Općine, nezakonite smjene izborne komisije, svih upravnih i nadzornih odbora, kršenja Poslovnika OV... Nažalost, ovakve vijesti su postale svakodnevica i rezultat su nastojanja ponajviše zamjenika predsjedavajućeg, kao i pojedinaca u

njegovoj stranci, da destabiliziraju izvršnu vlast, iako je poznato da sam kao načelnik, dobio više glasova (i bošnjačkih i srpskih), od bilo koje koalicije u vijeću.

Nejasna mi je i korelacija smjene zamjenika predsjedavajuće sa interesom Bošnjaka, budući da po Statutu Općine to mjesto trenutno pripada Bošnjacima. Ukoliko i dođe do smjene trenutnog zamjenika predsjedavajuće, ta funkciju će opet obnašati Bošnjak. Ili se neko smatra većim Bošnjakom od drugih?

Nastojanje prikazivanja moje borbe za šumski resurs kao za srpski interes je još jedan pokušaj dizanja nacionalnih tenzija tamo gdje one ni u naznakama ne postoje.

Amandmani naše općine na federalni Zakon o šumama su identični amandmanima koje su na isti uložile općine Konjic, Vareš i Olovo i nemaju nikakve veze sa bilo kojom politikom na nivou drugog entiteta.

Poštovani građani,

Nisam pripadnik niti jedne političke stranke i Vaše povjerenje sam i drugi put zadobio na osnovu rezultata rada, kao i zbog nacionalne neopterećenosti. Ne dopustite da Vas zavara govor ljudi koji se već 20 godina služe istim trikovima, a koji dobijaju medijski prostor režimskih portala, propagirajući nacionalističku retoriku. U sazivu našeg OV egzistira 11 političkih partija svih predznaka, a taj pluralizam je zapravo odraz demokratskog stanja u našoj općini, što nam nameće kao obavezu da radimo zajedno i da se uvažavamo međusobno.

Ostavimo nacionalističke huškače da žive u prošlosti, jer im je, po uzoru na njihovu priču, tamo i mjesto.

S poštovanjem,
Vaš načelnik, Zlatko Hujčić.

Komentar na izjavu Harisa Mešića, u Dnevniku USK-na, od dana 06. augusta 2017.

Njegova izjava u kojoj se spominje „preusmjeravanje sredstava od dobiti ovog preduzeća, lokalnim zajednicama“, je još jedna od niza laži kojima se ovaj covjek uporno služi, obraćajući se narodu medijski, očito misleći da je narod lud.

Naročito ovaj petrovački, zahvaljujući kojem je i postavljen na to mjesto, u suštini.

Bolje bi bilo da nije (postavljen), jer nikada se ovoliko nije sjeklo i odvozilo balvana - prije njega, a manje davalo ovoj opštini.

Očito da sada poslušno odradjuje svoje obećanje, u smislu „Samo vi mene postavite za generalnoga, a moja su briga petrovački balvani“ ! Nekoliko desetina kamiona, svakodnevno, odlazi odavde i on eto, priča o prioritetima prema opštinama, na užtrb Sanice.

Naravno da ljudi u Sanici, shvataju suštinu pozadine. (Ispade, dakle, da su lokalne zajednice sputale ovo preduzeće, od prvobitne namjere.....!?)

Jer, direktor izusti i to kako je „praktično, plan implementacije (za Sanicu), BIO mrtvo slovo na papiru....“ !?

U posljednjih pet godina, ova opština nije dobila niti jednoga feninga, od dobiti čiji najveći dio predstavljaju petrovački balvani. Na nedavnoj sjednici opštinskoga vijeća, na kojoj je Mešić slučajno prisustvovao, jer je izabrani vijećnik, tako je nabrojano nekoliko stavki u ukupnoj vrijednosti, od oko 300.000 km (od te dobiti), za Bosanski Petrovac.

Cista laž, naravno.

Niko se nije nikada javno izvinuo, ovom jadnom narodu, za ovo plasiranje takvih i sličnih, nebuloza od strane tadašnje - čudno nastale, vijećničke većine.

(Pitam ja sada neke odgovorne ljude, da kažu – ako hoće, naravno, je li veći grijeh ovo reći javno i glasno, ili lagati narodu, takodje javno i glasno ?)

Iznudjeni direktor, osim što je nespojivo da bude vijećnik, jer svjesno krši Zakon o sukobu interesa (nespojivost funkcija), ipak je uredno primio 6.650,00 km, za 19 sjednica općinskoga vijeća, od kojih se, međjutim, nije pojavio na njih 7 (sedam). Dalje, na moj zahtjev da saznam(o) njegova sveukupna .

Podsjetimo, usput, i na podatak (trošak !), da ga svaki dan vozač vozi u B. Krupu i vraća nazad, u luksuznom Audi-6, što će morati jednoga dana, svakako - pored svih ostalih stavki njegove cijene koštanja, servirati ovom narodu.

O zapošljavanju podobnih, nećemo ovaj put.

Da zaključimo ovaj osvrt podjećanjem da nema ekonomije koja je dugo trajala izvozeći balvane.

Najnovija farsa oko Sanice, je samo dodatni dokaz unaprijed smišljenog scenarija, u kojem zapravo nikada nije bilo planirano otvaranje ili finansiranje finalne proizvodnje - bilo gdje i bilo kada, uključujući i našu Sanicu.

Pa, zašto to nisu uradili za sve ove protekle godine ?

Zato što treba odvojiti novac za nove pogone, mašine, zapošljavanje i sveopšti progres. Treba zadržati ljude da ne idu sa svoga u tuđe, treba ih zaposliti....Dobit, valjda, služi za širenje, jačanje i novo zapošljavanje. Drvna industrija je u kontinuiranoj ekspanziji, svugdje, pa i kod nas, s pokrivenošću uvoza izvozom, tri puta većom od svih drugih djelatnosti....

Marionete, ovoga puta domaće , odradjuju ovakve „projekte“, a petrovčani neće nikada stati u borbi za eliminisanje onih koji ga eksploatišu, rugajući se pri tom, čak i presudi ustavnoga suda, izmedju ostaloga. I ne samo petrovčani, naravno.

Na kraju, ističemo i ovaj put da ćemo i dalje, svim legalnim sredstvima, djelovati protiv onih koji ovu lokalnu zajednicu šikaniraju, eksploatišu i ponižavaju, bilo da su pojedinci ili neko drugi.

U Bos. Petrovcu, 07. augusta 2017.

Zlatko Hujić, načelnik

Bajramska akademija

Povodom Kurban-bajrama, u Domu kulture je 30.8.2017. godine, upriličena Bajramska akademija, kojoj su prisustvovali brojni građani naše Opštine.

Kurban-bajram, ili Hadži-bajram, najznačajniji je islamski praznik, blagdan prinošenja žrtve Allahu. Muslimani širom svijeta klanjem kurbanu iskazuju bogobožnost, ljubav i spremnost na svaku žrtvu pred Allahom dž.š. Kurban znači približiti se onome ko nam daje.

Na samom početku, o vrijednostima, običajima , tradiciji i pravilima vezano za Kurban-bajram govorio je Alem Jaganjac.

Vjernici, kojima to životni uslovi dozvoljavaju, posjećuju najveće muslimansko svetište u Meki, , i tako obavljaju hadž, jednu od pet temeljnih dužnosti muslimana.

„U ime Allaha dužan je hodočastiti K’abu, svaki onaj koji je u mogućnosti...“ (Alu-Imran, 29. ajet).

Prve četiri dužnosti: 1.“Svjedočenje da nema boga osim Allaha”; 2.“Obavljanje namaza – molitve”; 3.“Davanje zekata”, tj. udjeljivanje određenog dijela imovine osobama u oskudici; 4.“Post mjeseca ramazana”.

Akademiji je pored mnogobrojnih građana prisustvovao i savjetnik Općinskog načelnika dr Sanel Gredelj.

U nastavku programa, prisutni su uživali u izvedbi ilahija hora „Mali bulbuli“, pod vodstvom Zemire Mašić. Nakon toga najmlađi su izdvoili recitacije, pjevanje i glumu, a sve to prožeto najčistijim poštovanjem jednog od najvećih islamskih praznika.

Voditeljica programa je bila Melita Šehić.



Izvođenje hora "Mali bulbuli"



Prikazivanje običaja i tradicije...



Prepuna sala Doma kulture na Bajramskoj akademiji

Spomenik žrtvama u Bravsku

Uz prisustvo rodbine, prijatelja i svih onih koji su željeli odati počast žrtvama, služenjem parastosa i polaganjem vijenaca kod Spomen-krsta u mjestu Bravsko kod Bosanskog Petrovca, i ovog 7. avgusta je obilježena 22. godina od stradanja žrtava iz izbjegličke kolone 1995. godine na Petrovačkoj cesti.

Na ovom mjestu poginulo je devet civila, među kojima je četvero djece i 21-godišnja djevojka, dok je na desetine ranjeno.

Svojim prisustvom, i ove godine, polaganjem cvijeća i naklonom, poštovanje stradalim žrtvama, ali i svim ostalim nevinim žrtvama čiji životi su nepovratno izgubljeni, odao je načelnik naše Opštine, Zlatko Hujčić.

Prisutnima se obratio Savo Štrbac, predsjednik Dokumentaciono informacionog centra „Veritas“ iz Beograda. Podsjetio je prisutne i ovom prilikom da je naša dužnost sjećati se svake godine i odavati počast stradalima.

Pored načelnika Hujčića i predsjedavajuće Opštinskog vijeća, Nikoline Simić, prisutni su bili i načelnici Donjeg Lapca, Ilija Obradović, Drinića, Milan Grbić.

„Na odavanju počasti, ovdje, svake godine vidim ista lica. Moramo znati da se prošlost ne može popraviti, ali se može pamtititi da bi se gradila budućnost. Na ovom mjestu nije bitna ni politika, ni nacija, ovdje postoji jedna humanost koja nas sve spaja i koja nas je danas dovela na obilježavanje“, istakao je načelnik Hujčić, koji je ovom prilikom izjavio saučešće i saosjećanje sa porodicama žrtava.



Polaganje cvijeća na spomeniku u Bravsku

Međunarodni dan mladih

U povodu 12. avgusta, Međunarodnog dana mladih, kojeg su Ujedinjene nacije ustanovile 1999. godine, predstavnici mladih Crvenog križa Opštine Bosanski Petrovac su dana 11.8.2017. godine bili u posjeti načelniku Zlatku Hujiću.

Međunarodni dan mladih je prilika za promociju aktivizma ove populacije i ukazivanje na njihove napore koje čine u postizanju pozitivnih promjena u društvu.

Ovogodišnja globalna poruka UN-a povodom obilježavanja Dana mladih glasi: „Mladi grade mir“, u cilju da se mladi ohrabre za sprečavanje sukoba, inkluziju, socijalnu pravdu i održivi mir.

U cilju promocije rada i aktivnosti Crvenog križa, mladi Crvenog križa podijelili su građanima naše Opštine promotivni materijal u kojem se nalaze sve informacije kako neko ko želi postati koristan član zajednice Crvenog križa, to može i učiniti.

Tokom posjete načelnik Hujić je svim mladima u Bosni i Hercegovini čestitao njihov dan, te je poručio mladima da ne čekaju pasivno, da se trude, rade i bore kako bi doprinijeli lokalnoj zajednici, da uče i svojim znanjem pospješe okruženje u kojem se nalaze.

Mladi su se zahvalili načelniku na čestitkama, na podršci rada Crvenog križa, a posebno na učešću u svim aktivnostima mladih u našoj Opštini.



Petrovačka omladina sa načelnikom Hujićem

Školske torbe za prvačice

Već tradicionalno, prvog dana nove školske godine prvačicama koji su upisani u centralnu OŠ „Ahmet Hromadžić“ i područne škole, Opština Bosanski Petrovac u saradnji sa bosanskopetrovačkim privrednicima će uručiti poklone u vidu školske torbe sa priborom.

„Cilj projekta je da polazak djeteta u školu, koji predstavlja radost za cijelu porodicu, posebno obilježimo, i u ovim teškim vremenima roditeljima pomognemo onoliko koliko je to u našoj moći. Naša namjera je da u saradnji sa privatnim poduzetnicima obezbijedimo sredstva za kupovinu 50 đačkih torbi“, istakao je načelnik Hujić.

Za prvi dan škole predviđena je priredba u OŠ „Ahmet Hromadžić“, na kojoj će načelnik, kao i prethodne 4 godine, uručiti torbe prvačicama, i gdje će biti istaknuto koje su to društveno odgovorne firme učestvovala u ovom humanom projektu naše Opštine.

Na kraju, ovaj projekat ima višestruki značaj, a prvenstveno se ogleda u tome da naši najmlađi sugrađani vide da je lokalna zajednica uz njih i da podržava njihovo obrazovanje.

Takmičenje u aeromodelarstvu na Medenom polju

Na Medenom polju, dana 26.8.2017. godine, u organizaciji Aerokluba "Izet Kurtalić" iz Visokog, održano je tradicionalno internacionalno takmičenje aviomodelara u klasama slobodnog leta koje se boduje za Svjetski kup.

Riječ je o takmičenju, 35. Memorijal Izet Kurtalić, koje je posvećeno učitelju Izetu Kurtaliću, po kome i Aeroklub nosi ime.

Na Medenom polju, u subotu se okupilo oko 30 takmičara, iz raznih zemalja: Hrvatska, Srbija, BiH, Njemačka, Austrija, Slovenija i Argentina.

"Ovo je 35. Memorijal posvećen našem učitelju Izetu. U Federaciji imamo registrovanih 20 klubova, koji imaju razne discipline. Mi smo jedni od rijetkih koji njeguju aeromodelarstvo", istakao je predsjednik Kapetanović.

Dalje u razgovoru sa predsjednikom Aerokluba doznali smo sa kojim se problemima tokom organizacije susreću: "Nama je jako teško organizovati ovo takmičenje, od naše Opštine jedino imamo podršku, pa bismo rado ostvarili saradnju sa Bosanskim Petrovcem, da povežemo naše aktivnosti sa vašim terenom, koji je idealan spoj vjetra i položaja, kao i blizine sa Hrvatskom i drugim evropskim državama, što je od velikog značaja za naše takmičare", dodao je Kapetanović.

Takmičenje se odvijalo u tri klase : F1A (jedrilice), F1B (gumenjaci) i F1C (penjači):

F1A :

1. Thomas Wimer (Njemačka)
2. Edin Šahinović (Bosna i Hercegovina)
3. Miha Lemut (Slovenija)

F1B :

1. Mirsad Kapetanović (BiH)
2. Soniboj Šabo (Hrvatska)
3. Haris Jusfbašić (BiH)

F1C :

1. Reinhard Truppe (Austrija)
2. Claus Greeter (Njemačka)
3. Anton Vidensek (Slovenija)

Aeroklub "Izet Kurtalić" formiran je 1953. godine u Visokom i jedan je od najuspješnijih jugoslovenskih, bosanskohercegovačkih i svjetskih aeroklubova. Danas se članovi kluba bave modelarstvom i letenjem kao primarnim aktivnostima.

Ovim takmičenjem Medeno polje je još jednom dokazalo svoju prepoznatljivu slavnu istoriju, koja i dalje živi, ne samo u našoj državi, već i šire.

Podsjećamo da je letilište na Polju korišteno za sportske aktivnosti i u bivšoj Jugoslaviji.



Jesen u Bosanskom Petrovcu...



Važni brojevi u Općini Bosanski Petrovac

Policija	122
Hitna pomoć	124 ; 883-687
Vatrogasci	123
OPĆINA BOSANSKI PETROVAC	883-570

**Slušajte Radio Bosanski
Petrovac od 15:00-17:00,
svakim danom na 90.9 MHz fm**